



UNIVERSITI
TEKNOLOGI
MARA

Cawangan Negeri Sembilan
Kampus Rembau

2024

RONA TINTA

e-BULETIN
EDISI
2024

FAKULTI PENGURUSAN & PERNIAGAAN
UNIVERSITI TEKNOLOGI MARA
CAWANGAN NEGERI SEMBILAN, KAMPUS REMBAU



CHIEF EDITOR
SYAZLIANA KASIM

EDITORS
FARRAH OTHMAN
NOOR AZILLAH MOHAMAD ALI
SHAHRUL AMRI AB WAHAB
DR. HAFIZ ALI, M.

eISSN 2785-9126



9 772 785 912 007





MEMAHAMI OBJEKTIF MEMBELI EMAS: PELABURAN, PERHIASAN DAN SUMBER TUNAI MASA HADAPAN

SITI HAJAR MD JANI

Emas merupakan logam yang tidak hanya berharga dari segi material, tetapi juga mempunyai nilai signifikan dari perspektif Islam. Dalam sejarah peradaban manusia, emas telah diiktiraf sebagai simbol kekayaan dan kestabilan. Dalam Islam, emas juga memainkan peranan penting, terutamanya dalam konteks *mas kahwin*, di mana ia melambangkan harta yang sah dan bernilai bagi pihak wanita. Emas menjadi pilihan utama ramai orang bukan sahaja kerana keindahannya, tetapi juga sebagai alat untuk melindungi kekayaan dari inflasi dan ketidakstabilan ekonomi.

Namun, sebelum membeli emas, seseorang perlu memahami tujuan dan objektif di sebalik pembelian tersebut. Adakah untuk pelaburan jangka panjang, sebagai perhiasan, atau untuk kemudahan tunai melalui institusi pajak gadai Islam? Artikel ini akan membincangkan kepentingan memahami objektif membeli emas, jenis-jenis emas yang sesuai, serta perbezaan antara emas yang dipakai dan emas yang disimpan.

Emas dalam Perspektif Islam

Islam mengiktiraf emas sebagai salah satu komoditi yang mempunyai nilai tinggi. Dalam perkahwinan, emas sering digunakan sebagai “mas kahwin”, di mana ia dianggap sebagai harta sah yang diberikan oleh suami kepada isteri. Ini menunjukkan bahawa emas bukan sekadar logam, tetapi juga lambang tanggungjawab dan nilai yang diberikan kepada pihak wanita.

Selain itu, Islam juga mengharamkan lelaki daripada memakai emas dalam bentuk perhiasan kerana dianggap sebagai bentuk keangkuhan dan pembaziran. Namun, lelaki digalakkan untuk memiliki emas dalam bentuk kepingan atau dinar sebagai satu bentuk pelaburan. Wanita pula dibenarkan memakai emas sebagai perhiasan kerana sesuai dengan sifat semulajadi mereka yang suka kepada kecantikan.



Gambar 1: Emas dalam bentuk barang kemas

Jenis-jenis Emas: Perhiasan dan Pelaburan

Emas boleh didapati dalam pelbagai bentuk, namun yang paling biasa ialah barang kemas, kepingan emas, jongkong emas dan dinar emas. Setiap jenis emas ini mempunyai kegunaan dan objektif tersendiri.

1) Barang Kemas

Barang kemas bukan sahaja digunakan untuk perhiasan, tetapi juga sebagai aset mudah cair yang boleh dipajakkan di mana-mana institusi pajak gadai Islam seperti Ar-Rahnu. Ini memudahkan pemilik emas, terutamanya wanita, untuk mendapatkan tunai segera apabila memerlukan. Selain menjadi simbol kecantikan, barang kemas boleh dianggap sebagai ‘aset simpanan’ yang boleh digunakan dalam masa kecemasan.

2) Kepingan Emas Dinar Emas dan Jongkong Emas

Kepingan emas, dinar dan jongkong biasanya dibeli untuk tujuan pelaburan. Ia tidak digunakan secara harian, tetapi disimpan dengan niat untuk dijual pada masa akan datang apabila harganya meningkat. Lelaki digalakkan untuk membeli emas dalam bentuk ini kerana ia selaras dengan shariah, di mana mereka dilarang memakai emas sebagai perhiasan.

Namun begitu, satu perkara yang perlu diambil kira ialah tidak semua institusi pajak gadaai Islam menerima kepingan emas atau dinar. Ini disebabkan risiko penipuan, di mana kepingan emas tersebut mungkin hanya disalut emas pada bahagian luar, manakala bahagian dalamnya adalah logam lain seperti besi.



Gambar 2: Emas dalam bentuk jongkong dan syiling dinar

Kadar Zakat untuk Emas yang Disimpan dan Emas yang Dipakai

Zakat emas berbeza, sama ada emas tersebut disimpan atau dipakai. Berikut adalah kadar zakat emas:

1. Emas yang Disimpan

Emas yang disimpan dan tidak digunakan perlu dikenakan zakat jika melebihi nisab (85 gram). Kadar zakat adalah sebanyak 2.5% daripada jumlah keseluruhan emas yang disimpan selama setahun.

2. Emas yang Dipakai

Emas yang dipakai sebagai perhiasan tidak diwajibkan zakat selagi kuantitinya tidak melebihi kadar *uruf* (kebiasaan) yang ditetapkan di setiap negeri di Malaysia. Jika kuantiti emas perhiasan yang dimiliki melebihi uruf, maka zakat 2.5% akan dikenakan terhadap jumlah lebih tersebut.



Gambar 3: Emas palsu

Pelaburan Emas: Jangka Masa Panjang vs Jangka Masa Pendek

Mereka yang ingin membeli emas untuk tujuan pelaburan perlu memahami bahawa emas adalah aset yang sesuai untuk simpanan jangka panjang. Nilai emas cenderung meningkat dalam tempoh lima hingga sepuluh tahun. Oleh itu, mereka yang membeli kepingan emas, jongkong dan dinar perlu bersedia menyimpan emas tersebut untuk tempoh yang lebih lama bagi mendapatkan keuntungan yang maksimum.

Sebaliknya, dalam jangka masa pendek, keuntungan daripada emas sukar diperolehi kerana harganya tidak selalu naik dalam tempoh yang singkat. Oleh itu, bagi mereka yang memerlukan kecairan segera atau ingin menggunakan emas sebagai alat pajakan, barang kemas adalah pilihan yang lebih praktikal.

Emas sebagai Aset Usahawan dan Wanita

Usahawan dan wanita digalakkan untuk membeli barang kemas kerana ia mudah dipajakkan di institusi pajak gadai Islam atau Ar-Rahnu. Dalam dunia perniagaan, aliran tunai yang lancar amat penting, dan emas boleh menjadi sumber kecairan segera apabila diperlukan. Dengan adanya barang kemas yang mudah dipajakkan, usahawan boleh

mendapatkan dana tunai untuk menampung modal perniagaan tanpa perlu melalui proses birokrasi yang rumit di bank.

Kesimpulannya, memahami objektif membeli emas adalah penting bagi memastikan pelaburan atau simpanan yang dibuat memberi manfaat yang optimum. Bagi tujuan pelaburan jangka panjang, kepingan emas atau dinar adalah pilihan terbaik. Manakala bagi tujuan perhiasan dan pajakan, barang kemas lebih sesuai kerana mudah diterima oleh institusi pajak gadai Islam. Setiap individu perlu menimbang tara tujuan mereka sebelum membeli emas, sama ada untuk kecantikan, simpanan, atau pelaburan.